



La ministra da finanzas Eveline Widmer-Schlumpf preschenta a Berna la nova strategia davart il plaz da finanzas dal cussegl federal.

KEYSTONE

## Cussegl federal na vul betg autodecleraziun obligatorica

■ (rtr) Las bancas svizas na ston betg pretender dals clients ina decleraziun ch'i hajan pajà taglias sin las facultads. Quai tenor la nova strategia per il plaz da finanzas svizzer ch'il cussegl federal ha preschentà. Per impedir da survegnir daners nairs duain las bancas suttastar a reglas pli restrictivas. Quellas duain sa drizzar a las prescripziuns en il rom dal cumbat dal lavar daners ed il cumbat cunter la finanziaziun dal terrorissem.

Tenor il Departament federal da finanzas è l'examen uschia tut tenor ristg era pli restrictiv. Ina decleraziun sch'ils clients hajan pajà taglia sin las facultads possian las bancas dumandar, quai na saja dentant betg obligatori.

La federaziun dals banchiers svizzers sustegna la strategia per il plaz da finanzas ch'il cussegl federal ha preschentà. La

federaziun dals banchiers è er pronta da collavurar.

### Partidas politicas reageschan different

La Partida socialdemocratica è dischillusa che las bancas proponan sezzas in regulativ che vegn sancziunà e controllà da la Finma. Tenor la ps è quai ina victoria da la lobi da bancas, ella pretenda in obligatori almain transitoric.

Per la Partida cristiandemocrata è quest model ina schliaziun dals banchiers. Uschia saja la responsabladad simplamain sviada sin la Finma.

Per la Partida populara è il model dal cussegl federal pli u main acceptabel. In tal obligatori n'haja nagin stadi dal mund, quai na dovria la Svizra era betg.